

Kálag echě Paalε áténlé Baá Kolose Ndibned ní kálag

Paalε, mbapεε a nlomag nhóg awe Yesu Krístəə mós antěl enén kálag áde ádíí á mbwəg á dyad á Roma. Antelé bad bé dyad á Kolose. Saké Paalε andibé mwembé míme mbédé á Kolose. Epafrase mós andibé mwembé míme mbédé áwed. Epafrase ambé á dyad á Efesus. Anwóg eyale é Dyöb áwed, adúbe-’ε Yesu Krístəə. Anhidnéd échě eyale, áke ákal chó á Kolose, ádíbe-’ε mwembé áwed. Ambíd e pónde, Paalε anwóg nén bán bemeléde bé metóm bépééné ayáge áde déeboó á mwembé-te wê. Abê bemeléde béyágté’áá nén bán, kénzée awě ahede’ Dyöb abíi, awě ahede-’ε e’soosə akud, atəngéné née ábageé ngíne ne benkamlε bé nkönsé edúbé. Bán mod atəngéné-’ε née áhídeé mbéndé née áyag mod ne áhíd mbéndé émpē təngene ndyééd échě mod éētəngeneé adyé, ne ekud é mam émpē. Mmén mekan mésyāā-lóó mós mēnkəŋ boŋ Paalε áténlé bad bé mwembé mé Kolose enén kálag, áleb bó ábel bēbíi mbále təngene Yesu Krístəə ákamlε bad bésyāā ne ákamlε ngíne é nköŋ rísé ne mímín. Mwēnpēnaá ahele ahúd syānē á mbéb-te.

Nkabtéd ní kálag

Ndibned ní kálag 1.1-8

Nsón míme Krístəə 1.9-2.19

Alongé dékōlē ábe ne Krístəə 2.20-4.6

Nsógten 4.7-18

Paale alómmé bad melɛntɛn

¹ Mɛ Paale, mbapɛɛ a nlomag nhóg áwɛ Yesu Krístəə, ngáne Dyöb áttíde mɛ-ɛɛ ntenlé nyé enén kálag. Se Timoti, awesyánē mwānyan a Krísto, sêlómme nyé melɛntɛn. ² Ntenle nyé bad bé Dyöb ábe nyêdé á dyad á Kolose. Nyêdé ne Krístəə, nyêhíde-’ɛ mó ne nlém nhóg. Nsimé ne nsan í Dyöb Titée awêd mbé ne nyé.

Paale aságnéné Dyöb á mekáne-té

³ Póndé téé sêkännad nyé, séságnān Dyöb, Sáá awɛ awɛd Sāngwéé, Yesu Krístəə. ⁴ Séságnan Dyöb áyāle sêwógé bán nyêdúbpé Yesu Krístəə, nyêdəá-’ɛ bad bé Dyöb bésyāāl. ⁵ Sêbíí nén bán nyêbele’ nê áyāle nyêsumé nlém nén bán nyéékúđ nnam míme Dyöb ákóñnéde nyé ámín. Nyemmād mam awóg t̄ngene míme nnam áde bésébpé nyé nkalan í bwām í mbále akale. ⁶ Mmén nkalan í bwām mé nsimé í Dyöb íkanlad mebwóg ne mebwóg íkag á’sō. Epun e é’só éche nyéwógé nyénsóñtén bán Dyöb ákóñté nlém í bwām awón ne bad bé mbéb. ⁷ Epafrase, mbəleɛ awe Yesu Krístəə móo ankalé nyé míme nkalan. Adíí mod awɛ syāābōō sêbele’ nsón, sêdəá-’ɛ mó bwāmbwam. Abenle’ Yesu Krístəə ne nlém nhóg. Abé áde adíí-’ɛ ne nyé, nsón míme sént̄ngēnnē abel móo ábelɛé. ⁸ Mó aláñgé-’ɛ sé aá Edəádəñ é Dyöb ébéle nyêdəá bad bé Dyöb.

⁹ Né-óó, bootya póndé eché séwógé míme nnam, sêkännad nyé póndé téé. Sêkanne nén bán Dyöb ábel nyékon chöm éche áhɛdeé aá nyébel asóñtɛn. Sêkanne nén bán Dyöb ábe nyé debyéé ne nsóñtɛn ábel nyésóñtɛn mam mé Edəádəñ bwām. ¹⁰ Nê

débĕl ádĕn alongé débĕ ngáne alongé áde bad bé Dyöb átáŋgéné abé. Nyéēbele' mam nímĕ méwógte mó menyinġe. Mekan mé bwám mó ne mó-'é nyébeléé. Nyaa echĕ nyésōŋtĕn-naá Dyöb, ěchāgkĕ acháge ne acháge. ¹¹ Sĕkānne-'ε ámpĕ nĕn bán, Dyöb ábĕ áwĕd nyé áte ne echĕ ngum echĕ echabé ámĭn, ábel nĕn nyéhĕl awēsĕn, nyĕkan nĕm, nyébé-'ε menyinġe áyāl e mam mésyāāl. ¹² Nyéēsāgnĕn Titĕe áyāle chōm ésyāāl. Mó-'aá abelé boŋ nyĕkwognéd ábĕ bad ábe bĕkobe akab á bwĕm ábe ákōŋnédé ábĕ bad hōm áde e'nyĭnen bé ekĭde é'díi. ¹³ Ahúdé syánĕ ásĕ e ngĭne e nkamlĕne a ehĭntĕn, apĕné syánĕ ásĕ e nkamlĕn nĭme awe Mwān a nĕm. ¹⁴ Dyöb álágsĕné syánĕ nĭmed mbĕb akōde áde ákódtĕ syánĕ ne mekií nĭme awe Mwān ásyógĕ á awōg.

¹⁵ Modmod eenyĭnnéé Dyöb dĭd. Boŋ bad bénsōŋtĕn ngáne Dyöb ádíi áde bényĭné Krĭstā áyāle adii nwágĕn ní Dyöb. ¹⁶ Edé nĕ áyāle, mb-wiined ne Krĭstā dōo Dyöb áhágĕ bwĕm é'syāāl á nkoŋ ní mín ne nĭsé. Ahágĕ bwĕm ábĕ bényĭnnéé dĭd ne ábĕ béenyĭnnéé dĭd. Mó ahágĕ benkamlĕne, ne ngĭne ésyāāl. Dyöb áhágĕ bwĕm é'syāāl mb-wiined ne mó, mó-'aá Dyöb áhágkĕ ábĕ bwĕm é'syāāl. ¹⁷ Bédĕháb bán béhāge' kéchéé á nkōŋséte né Krĭstā adé alongé. Mó-'aá akāó boŋ bwĕm é'syāāl ébĕ á e'dii. ¹⁸ Mó adé nló nĭme bad ábe bédúbpĕ mó, bó-'aá bédé nĕŋgáne eche yāl. Mó abage ábĕ bad alongé áyāle mó adé mod a'só awĕ Dyöb ápúúdtĕ awĕ ábĕ-'ε abé ne abé. Nĕn dĕmbĕnléd ábel nĕn ábĕ nkamlĕne ámĭn mekan mésyāāl. ¹⁹ Mmĕn mekan médé nĕ áyāle nĕn Dyöb dĕn-éé ádĕ. ²⁰ Dyöb dĕmbĕl nĕn aá chōm ésyāāl

étim ásē ne mós Dyöb mbwiined ne Krīstæ. Abén bwēm é'bédeé bwēm bé nkoŋ rísé ne bwēm bé nkoŋ mí mín áyāle asyog áde awe Mwǎn ásyógé mekií á awog. Bɔɔb-pɔɔ, chɔm ésyā́l éhēle ébē nsaŋ ne Dyöb.

²¹ Nyé ne nyé nyēmbé nchabned ne Dyöb, nyāābe Dyöb nyéebédeé áyāle mewēmtēn mé mbéb míme nyénwōŋ'é ne mbēltéd mé mbéb míme nyébéle'áá. ²² Boŋ bɔɔb, Dyöb ábéle nyētímé ásē ne mós, awé áde awe Mwǎn Krīstæ awē abédeé moonyoŋ áwédé á awog. Dyöb dēmbēl nē ábel nén nyébē wēe módíí, nyébē bad ábe bésáá, nyéewóó atón dé mbéb ké ahóg á yǎl, béēkōbnē-'ε nyé awusé ké ahóg. ²³ Ebē nén bán áden adúbe adii awúú áte nyéehúde-'ε mekuu ásē ne asum áde nyésumé nlém áyāl e nkalaŋ mí bwām míme nyéwógé. Mmē nkalaŋ mí bwām míme nyémáá awóg, rídii nkalaŋ míme ríkánlédeé nkōŋsé áte rísyā́l mós-'áá me Paale, rítímé mbālede a Dyöb ákal.

Nsón míme Paale

²⁴ Ndé menyinŋe bɔɔb ne metake míme ríkudéé áyāl echēn. Ngáne ríkudéé mímén metake, mmade metake míme Yesuε mímé rítāŋgéné abé, áyāl eche yǎl, nédē bad ábe bédúbpé mós. ²⁵ Dyöb ábéle me mbāledeé ábele bad ábe bédúbpé Krīstæ. Alómé me áá ríkoŋ nyé échē eyale akale bwām. ²⁶ Bɔɔd, éché eyale émbē dyam áde bad bēnkēnsóŋtēnné. Boŋ bɔɔb ábele ábē bad bēbíí chó. ²⁷ Dyöb áhede' nén áá ábē bad bēbíí nén bán nhon ne ehúmé éche Krīstæ édé káŋne ne bad ábe béesé bad bé Israél. Kun éché edé áwēd-te edii nén bán, nyésum nlém nén bán nyéēkūd ehúmé éche Dyöb áhóbé áá mósbē ábē bad. ²⁸ Né-'áá ákáo boŋ sélāŋgē bad tēŋgene

Krīstəə kēhéé wéε sékagké. Sēlébe', séyāgtē-'ε bó ne debyéé ásyā̄l áde Dyöb ábágé sé. Sēbele nê áyāle sēhede nén bán békobned á'sō é' Dyöb nēngáne bad ábe mekuu mémáá awédned ásē á adúbe-tē. ²⁹Boŋ nwane áte bwāmbwam. Ngum echē Krīstəə eche edé με áte, chó-'ε ebage με ngíne áwan áte.

2

¹Ndəə mēé nyébii ngáne ríkempεé awan áte áyā́l echên, ne áyā́l e bad bé dyad á Laudesia, nyébii-'ε ngáne ríkempεé awan áte áyā́l e bad bémpēe ábe béēnyinnē με dīd. ²Mbele nê áwéd bó nlém á abum ábel boŋ edəŋge éche édé átintē echên ébel nyébê mod nhóg. Nhede με nyāābōō nyésuṃ nlém ne asum ásyā̄l nēε bad ábe bésōŋténé dyam á Dyöb áde bad bēnkēnsōŋtēnné. Adē dyam-me ádíi Krīstəə mwēn. ³Krīstəə móō ahele ábēl boŋ nyēwón debyéé ásōŋtēn mekan mé Dyöb. Mmé mekan médé etógnén bwāmbwam. ⁴Nlāŋge nyé nén ábel boŋ mod eédogné nyé e'nyin bé nsal áte se nyēwémtén nén bán dyam áde álāŋgεé nyé átāŋgéné. ⁵Ndəə mēé nyébii nén bán kénεε mmēn méesaá ne nyé, ndé ne nyé é edəádəŋ. Kénεε méesaá-'aá ne nyé, ndé menyīŋge nén adúbe áde nyédúbpé Krīstəə ályáge áde ngíne.

*Bad bé Krīsto béesaá ásē
e mbéndé é nkōŋsé ámpē*

⁶Né-ṵó, ngáne nyékóbe Krīstəə nēε Sāŋgwéé awên, nyébê nyébele' ngáne áhedeé. ⁷Adúbe áde nyédúbpé chōm-εε ábēn bemeléede bēyágté nyé édé mbále. Nyéságnan-ne Dyöb pónde té áyāle chōm ésyā̄l. ⁸Nyéēmwāg-se mod atéd nyé ntāŋ áhíd e'hóhó bé áyáge dé metóm áde bēyágtéε.

Ayáge áđě báyágtεé nyé áđíi ayáge áđě békóbé wéε ábāb betaa ne áde áhíde mbéndé é mekan mé nkǒńsé. Áđě ayáge áđíi ayáge áđě áhúú ne baányonḡ ngēn déēhúú'é ne Krīstāa. ⁹ Nyēmwāg-se ábē bemeléede bé metóm bédog nyé áyāle nén ngine ne abé á Dyǒb áde yāl e moonyon echē Krīstāa áte. ¹⁰ Né-ǒó, nyélóné mbon áyāle nén nyéde ne Krīstāa, Mó-'aa akamlan ngine ne benkamlenε bésyāāl. ¹¹ Abé áđě nyéđíi ne Krīstāa, Krīstāa ayagé nyé. Eesaá nēngáne moonyon áyagεé mod. Krīstāa mó ayagé nyé é edáǎdǎḡ-tê. Ahúde áden abé dé mbéb. ¹² Ade bēndusénné nyé, éde néε nyēnwé, béli mé nyé, Dyǒb ápūūd-tε nyé ne Krīstāa. Nén dēmbenléd ne nyé áyāle nyēndúbé nén bán ngine e Dyǒb echē epuúdté Krīstāa ēpuúd nyémpē. ¹³ Ngen e'só nyēmbé byánán nyēwéde áyāle nyēbóó'aa mbéndé é Dyǒb. Ene pónde-'ε né Krīstāa éēhūdēē nyé abé dé mbéb áyāl. Bon bǒǒb, Dyǒb ábágé nyé alonǒgé dékǒālē apuud áde ápúúdté syánē ne Krīstāa. Alāgséné syánē nímεd mbéb nisyāāl. ¹⁴ Edé nēngáne apínné mbéb nime syánē wéε ántenlé mó. Nédē nímé mbéb méesaá ámpē. Dyǒb ábómmé nímé mbéb á awǒg abome áde bébómmé Krīstāa á awǒg bon awé-'ε. ¹⁵ Dyǒb déntōm ngine ne benkamlenε bé nkǒńsé áte. Atóm áde ántōmmē bó, dényīnnēd ne moosyāāl ne awé áde Krīstāa ánwēē á awǒg.

¹⁶ Né-ǒó, nyēmwāg-se bad bēlāngē nyé bán nyēbelé awusé áyāle nyédyáǒkē donǒge dé medyé, ké'ε áyāle nyémwáǒkē donǒge dé mmítéd, ké'ε áyāle nyēēbāǒkē donǒge á ngande ásē, ké'ε ngande echē ebāǒ nzé ngon étúbé túbén, ké'ε ngande e Epun é Nkóme áte. ¹⁷ Echē mbéndé ésyāāl

ébedé-’ε née e’diidingε ábĕ é’lúmté’áá mam mé bwâm míme Dyōb déntāngēnnē alóm. Krīstāa mós-’áá alónté mímé mam mésyāāl. ¹⁸ Nyéemwāg-σε mod anyágéd nyé áá nyētāngéné yāl asuded. Nyéemwāg-κε σε mod anyágéd nyé nén áá nyētāngéné ángel edúbé abε ngáne ábageé. Nzé nyêbelé nê né nyéēbōd ndε echĕ Dyōb áhóbé áá mósōbĕ nyé. Kénzée awĕ ayágte’ nê, ahóbe’ áá mónyīnē á ndóg-te. Ene ndín e mod edé kúmbe ngĕn ne mekan mé mbéb míme mbíde’ mós á nlém-tê, boŋ eewóó’é nzom ké póg ábé. ¹⁹ Ene ndín e mod esóge Krīstāa awĕ adé nló mí bad ábe bédúbpé adúbe. Ngáne nló ríkamlanné yāl esyāál, melemlem nê dós Krīstāa ákamlanné bad ábe bédúbpé mós bésyāāl ábel bébĕ mod nhóg. Ngáne nsid ríladεé mebóŋ mé yāl mé mod boŋ abé mod nhóg, nê dós Krīstāa áladεé bad ábe bédúbpé mós ábé mod nhóg ásē echĕ. Mmê nlatén ríkwoge-’ε ngáne Dyōb átífidé.

Awé ne ábé á alongé ne Krīstāa

²⁰ Edé bōob byánán awé áde Krīstāa áwédé, nyéwédé ne mós. Né-ós nyéēsaá ásē e mbéndé é nkōŋsé ámpĕ. Cheé-ō ékás boŋ nyêbé nyéhídĕ’ échĕ mbéndé byánán nkōŋsé rídii ríkamlan nyé? ²¹ Abĕ bemeléde bé metóm bélānge nyé nén bán, “Nyéechāngé échĕn, nyéewóglán échíníí á nsəl, nyéēsítán échĕ.” ²² Echĕ mbéndé esyāāl énonĕ’ bwēm ábĕ béēbāg dyamdyam ámpĕ nzé mod amaá bós abenled. Echĕ mbéndé édíí mbéndé ne ayáge áde bad bĕn béhāgné nló. ²³ Echĕ mbéndé ébelé ényīnnāād byánán édé debyéé áte bwāmbwam áyāle nén, éyágte bad nén bán bĕn

bétāngéné née béwóó nlém âbel mekan míme mékámé abel, âlúmed nén bán békoo Dyöb ahíd. Eyágte bad bán bésuded yǎl, bébane-’ε yǎl á metake-tê bwâmbwam. Boη ké bad bénhūū échê mbéndé ahíd, éeheléeé bó awōηgen ásóg mewêmten mé mbéb awōη.

3

¹ Edé bōōb byánán apuud áde Dyöb ápúúdté Krīstæ, nyémpē nyēpuúdé ne mó. Né-óó, nyébê nyóngé áyāl e mam mé mǎn, wée Krīstæ ádíí á nkamlen á ekáá émbáá é Dyöb. ² Nyébê nyésum nlém áyāl e mam mé mǎn, nyéēsūmē nlém áyāl e mam mé nkōηsé. ³ Nyébíí nén bán, awé áde Krīstæ áwédé, édé nēηgáne nyémpē nyêwédé. ⁴ Krīstæ mó ádé alongé áđēd, áde ápéé-’ε á nkōηsé-te wén nyémpē nyéēbē ne mó ne ehúmé ésyāāl.

Alongé dé nchun ne alongé dékōālē

⁵ Né-óó, nyéhūd mekan mé ekob é yǎl nlém ne ahúd ásyāāl. Nyéhūd nlém áyāl e mam nēηgáne, akáb dé mesón, mbinde é mekan, esíí é mam mé ekob é yǎl, âwōη mewêmten mé mbéb ne ngoód. Nzé nyède ngoód né édé nēηgáne nyébage Dyöb démpēe edúbé. ⁶ Dyöb dékōgsēn bad bésyāāl ábē bébele’ échén ndín e mekan. Echén ndín é mekan éliηse’ Dyöb, né-óó, ákōgsēn bad ábe bébele chó hēén. ⁷ Echén ndín é mekan chóo nyébéláá ngen e e’só, áde esíí é mekan mé nkōηsé ékámánnáá nyé. ⁸ Boη bōōb mekan nēηgáne meliηgá, pél, ekoyí, ábébed mod dīn, ne ábéb nsal áte, nyétāngéné mó asóg dé abel. ⁹ Nyéēkanlé’ nhóg ne aníníí metóm. Nyéēbēlē’ mímén mekan ngáne édíí bán nyēmaá áden abé dé mbeltéd mé mbéb atede. ¹⁰ Bōōb-póó

nyêmaá nkob mékããlê ahé. Dyöb áhéde nyé áden alongé dékããlê áte, akwogte-’ε dó ábel nyébê néé mó, nyékon-’ε mó awě ahegé nyé abíi bwâm. Awón áde nyéwóó áden alongé dékããlê ábéle ¹¹ nhənlén méesaá átíntê e mod awě adé mod a Israel ne awě eésě, ké’ε mod awě béyágé ne awě béeyagεé. Ken mod adé mod a nken-ε, ken mod e ahín-tê-yε, ken ntān-ε, ken kunze-yε. Krístəə mó adé dyam ásyāāl adé-’ε bó mod asyāāl áte.

¹² Né-ɔɔ, nyétəngéné nlém ní ngəl awón, nyétəngéné nlém abon, nyétəngéné-’ε yəl asuded. Nyétəngéné apwiited, nyétəngéné-’ε awεsen. ¹³ Nyétəngéné nhóg ne aníníi awεsen. Nzé mod bó waáb békúú waáb álagsén mó. Ngáne Səngwéé álagséné nyé, nyémpē nyétəngéné nyélagsén nhóg ne aníníi. ¹⁴ Amín e nímén mésyāāl, nyédəŋ nhóg ne aníníi. Edəŋge chɔɔ élade’ chǝm ésyāāl. ¹⁵ Krístəə abelé nyédé nsan ne nhóg ne aníníi. Né-ɔɔ nímê nsan nítəngéné chǝm ésyāāl éché nyébeleé alyáged. Nyétəngéné nyésəgnēn-ne Dyöb pónde ésyāāl. ¹⁶ Eyale éche Krístəə ébê nyé á nlém-tê bwâm abé ne abé. Nyébeɛnlad éché eyale ne debyéé ásyāāl áyáged ne áleb nhóg ne aníníi. Nyékənne’ Dyöb ngəse éche édé á kálag e Dyöb. Nyékənne’ Dyöb ngəse éche ékənte’ Dyöb ne Krístəə, ne nkəngé ké níhéé níme nípiíde nyé ákémed Dyöb. Nyékənne’ mó ásaŋneɛn mó ne nlém nisyāāl. ¹⁷ Kéchéé éché nyéhóbeé, ké’ε éché nyébeleé, nyébele chɔɔ á dín áde Səngú Yesue. Nyésəgnan Dyöb Titée á dín á Yesu.

Alongé dékããlê áde nyétəngéné awón

18 Nyé bebaád bé bechóm, nyéwógne áben bechóm. Nê dǎo bad ábĕ bédúbpé Sǎngwéé bétǎngéné abel. 19 Nyé baachóm ábe nyéwóo bebaád, nyédǎng ábĕn bebaád, nyéētágté-'ε bó ngĕn.

20 Nyé bãnbǎn, nyéwógne áben bésáá ne benyaá áyǎl e kéchéé échĕ nyébeléé. Nê dǎo Sǎngwéé ádáó aá nyébel. 21 Nyé bésáá bé bãn, nyéēkǎnté áben bãn. Nzé nyĕkǎnté' bó, né nyésúnte bó yǎl áte. 22 Nyé betǎng, nyéwógne áben bewón pón dé ésyāā. Nyéēbenlé bó nsón dásō pón dé echĕ bényínéé nyé ábel békémed nyé. Bon nyébenle bó ne nlém nhóg áyǎle nĕn Sǎngwéé mós nyébagéé edúbé. 23 Nsón ké nhéé nímĕ nyébeléé, nyébele' mós ne nlém nisyāā. Nyébele mós, nyébíi-'ε nĕn bán Dyōb dǎo nyébenléé saké baányon. 24 Nyébíi nĕn bán nyéēkǎd nsábe níme Sǎngwéé ákónnéde ábĕ bad. Krístǎo mós adé mod awĕ nyékoo'ε abele. 25 Dyōb dékǎgsĕn kénzĕé awĕ abelé mbéb áyǎl e mbéb níme ábĕlé. Dyōb déekwognádté modmod.

4

1 Nyé bad ábe nyéwóo betǎng ásĕ echĕn nyéwále áben betǎng nyaa echĕ Dyōb áhédeé, nyéchǎa-'ε bó bwâm. Nyébíi nĕn bán nyémpĕ nyéwóo mod ámĭn awĕ nyédíi ásĕ echĕ.

Paale awéde' bad nlém á abum

2 Nyébĕ nyéwĕd yǎl áte á mekáne-tĕ. Nzé nyékánne-'ε nyébānĕ nlém ne kéchéé éche nyélǎngéé Dyōb, nyésǎgnĕn-nε mós. 3 Nyékánne-tĕ sémpĕ ábel nĕn Dyōb ánedned sé nzii ákal nkalan tǎngene Krístǎo níme bad békĕnsónǎtĕnné bóó. Mmĕ nkalan níme níkaléé mós níkáó bon mbé á

mbwəg. ⁴ Nyékānne' nén bán ríkale mó bwām nyaa echē rítəŋgéné abel. ⁵ Nyébíi ngáne nyébeleé mekan nzé nyédé ne bad ábe béédúbpe Krístəə. Póndé téé eche etál ébágné ne nyé, nyébenle' bó mekan me bwām. ⁶ Nzé nyáābō nyékale', nyéched ehób á nsəl, nyékale póle éche ébonje bad nlém á abum. Nzé nyébele' nê, né nyéēbīi ngáne nyékwəntanné kénzēé awě asēdté nyé dyam.

Melənten mé asóg

⁷ Tikikuse, mwānned a nlém a Krísto ālāā nyé mam míme mébenlad ne me hén. Mómpe adii mbəlede awě abenle Səŋgwéé ne nlém nhóg nchoo ne me. ⁸ Nlóme' mó áwēn ábel bonj álāā nyé ngáne sédíi, áwəd-te nyé nlém á abum. ⁹ Nlóme' bó Onesimus. Onesimuse mómpe adii mwānned a Krísto awesyānē awě dédáá. Mómpe abenle Krístəə ne nlém nhóg. Adii mod awě abídé áwēn dyad. Bó Tikikuse bēlāā nyé mam míme mébenlad hén.

¹⁰ Aristakuse awě sūmō bedé á mbwəg hén alěnté nyé. Banabase mwānyan mómpe alěnté nyé. Meməd nyé alāā təŋgene Makose. Nzé apedé, nyékob mó nken. ¹¹ Yesu awě béchəgēé bán Justuse, mómpe alente' nyé. Abén bad bēlāān bənpen bōō bédé bad bé Israel ábe bédúbpe Krístəə, ábe syāābō debele' nsón ákal nkalan təŋgene nkamlen ní Dyōb. Békéwəd me nlém abum bwāmbwam. ¹² Epafras mómpe alěnté nyé. Mómpe adii mod awě abídé áwēn dyad, abé-'e mbəlede awe Yesu Krístəə. Akānnad nyé póndé téé. Aá Dyōb dēn ábel nyékoŋ chōm éche áhedeé aá nyébel abii, nyébel-le chó. ¹³ Mmēn mbíde' mó mbón nén meé abelé nsón bwāmbwam áyāle echēn ne áyāl e bad bé Krísto

áβε βέδέ á Laudesia ne á Hirapōlis. ¹⁴ Lukase, dógtε awě dédáá bó Demase, bōmpē belómmé nyé melentεn. ¹⁵ Nyéεnted με bānned bé Krīsto ábe βέδέ á Laudesia. Nyéεnted-τε με Nimfaa, ne bad ábe βédúbpé bésyāāl ábe βébome' áwe ndáb. ¹⁶ Nzé nyēmaá enén kálag alán, nyélóm chó á Laudesia ábel bōmpē belân chó. Nyémpē nyényín nén bán nyéláá kálag echě rílómmé bad bé Laudesia. ¹⁷ Nyéláa Achipuse bán ányín nén áá mómadá nsón níme Sánḡwéé ábágé mó áá ábel.

¹⁸ Με Paale mmēn-εé mběnlédé échēm ekáá átele nyé nímén melentεn. Nyéēchatán nén bán ndé á mbwōg. Nsimé ní Dyōb ríbê ne nyé.

Mel̃ Mékō̃lē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48